



沈佺期集卷第一

賦

峽山寺賦 并序

峽山寺者名隸端州連山夾江頗有奇石飛泉迴落悉從梅竹下過渡口至山頂石道數層齋房浴室眇在雲漢神龍二年夏六月余投棄南裔承恩北歸結纜山隅周謁精舍為之賦焉

峽山精舍端溪妙境中有紅泉分飛碧嶺若



乃忍殿臨岸禪堂枕江桂葉薰戶蓮花照窓
銀函獅子之座金刹鳳凰之柱野鹿矯而隻
馴山鷄愛而頻舞千層古龕百仞明潭幡燈
夕透杖鋒朝涵炎光失於攢樹涼風生於高
竹仙人共天樂俱行花雨與香雲相逐法侶
徘徊齋房宴開心猿久去怖鴿時來走何爲
者竄身炎野旋旆京師維舟山下稽首醫王
誓心無常向何業而辭國今何緣而赴鄉豈
往過而追受將來愆而預殃即撫躬以內究
幸無慝以自傷心悞辱而知忍迹繫窮而辨
方嘉爾來之放逐謂吾生之津梁

蝴蝶賦

羗蝴蝶之可憇兮粉花育乎陽和二角六足
蠕腹狀蛾脉紺縷以玄翅點頰珠以細窠凌
獵蘭滋噓吸蕙葩飛將進而又退兮舍百態
以委蛇豈綿舞而不懈兮柰衆芬其鑠何圖
君子之翠屏儷綵族而星羅蒙左右之深賞
况夢寐之所嘉

霹靂引

歲七月火伏而金生客有鼓琴於門者奏霹靂之商聲始戛羽以騷素終扣宮而辟駘電耀耀兮龍躍雷闐闐兮雨冥氣鳴唵以會雅態歛翕以橫生有如驅千旗制五兵截荒虺斲長鯨孰與廣陵比意別鶴儔精而已俾我雄子魄動毅夫髮立懷恩不淺武義雙輯視胡若芥剪羯如拾豈徒慨慷中筵備群娛之翕習哉

五言古詩

有所思

君子事行役再空芳歲期美人曠延佇萬里浮雲思園槿綻紅艷郊桑柔綠滋坐看長夏晚秋月照羅帷

臨高臺

高臺臨廣陌車馬紛相續回首思舊鄉雲山亂心曲遠望河流緩周看原野綠向夕林鳥還憂來飛景促

黃鶴

黃鶴佐丹鳳不能群白鷗拂雲遊四海弄影
到三山遙憶君軒上來下天池間明珠世不
重知有報恩塚

鳳笙曲

憶昔王子晉鳳笙遊雲空揮手弄白日安能
戀青宮豈無嬋娟子結念羅帷中憐壽不貴
色身世兩無窮

古別離

白日東悠悠中有西行舟舟行有返櫂水去
無還流奈何生別者戚戚懷遠遊遠遊誰當
惜所悲會難收自君閱芳蕤青陽四五適皓
月掩蘭室光風虛蕙樓相思無明晦長嘆累
春秋離居久遲暮高駕何淹留

同工部李侍郎適訪司馬子微

紫微降天仙丹地投雲藻上言華頂事中間
長生道華頂居最高大壑朝陽早長生術何
妙童顏後天老清晨朝鳳京靜夜思鴻寶憑

崖飲蕙氣過澗摘靈草人非塚已荒海變田
應燥昔嘗游此郡三霜弄溟島緒言霞上開
機事塵外掃頃來迫世務清曠未云保崎嶇
待漏恩怵惕司言造軒皇重齋拜漢武愛祈
禱順風懷崆峒承露在豐鎬冷然委輕馭復
得散幽抱柱下留伯陽儲闡登四皓聞有叅
同契何時一探討

自昌樂郡沂流至白石嶺下行入彬
州

茲山界夷夏天險橫寥廓太史漏登探文命
限開鑿北流自南瀉群峯回衆壑馳波如電
騰激石似雷落崖留盤古樹澗蓄神農藥乳
竇何淋漓苔蘚更綵錯娟娟潭裏虹渺渺灘
邊鶴歲杪應流火天高雲霧薄金風吹綠梢
玉露洗紅籜沂舟始興屨登踐桂陽郭匍匐
緣修坂穹窿曳長紵礙林徒往來過堰每前
却救難不遑食飯畢昏無託濯谿寧足懼磴
道誰云惡我行湍險多山水皆不若安能獨

見聞書此遺京洛

過蜀龍門

龍門非禹鑿詭恠乃天功西南出巴峽不與
衆山同長短亘五里宛轉復嵌空伏湍响潛
石瀑水生輪風流水無晝夜噴薄龍門中潭
河勢不測藻葩垂綵虹我行當季月煙景共
春融江關勤亦甚巘嶸意難窮誓將息機事
鍊藥此山東

和杜麟臺元志春情

嘉樹滿中園氛氳羅秀色不見仙山雲倚瑟
空太息沉思若在夢緘怨似無憶青春坐南
移白日忽西匿娥眉返清鏡閨中不相識

入衛作

淇上風日好紛紛汾岸多綠芳幸未歇汎濫
此明波采繁憶幽吹理棹想荆歌鬱然懷君
子皓曠將如何

餞遠

任子徇遐祿結友開舊襟撰酌輟行歎指途

勤遠心秋晶澄回壑霽色肅明林暖然清軒
暮浩思非所任

枉繫

吾憐曾家子昔有投杼疑吾憐姬公且非無
鷓鴣詩臣子竭忠孝君親惑纒欺萋斐離骨
肉含愁興此辭

昔日公治長非罪遇縲紲聖人降兄弟古來
難獨絕我無毫髮瑕苦心懷冰雪今世多秀
士誰欲繫明轍

別侍御嚴凝

七澤雲夢林三湘洞庭水自古傳剽俗有詩
逋惡子令君出使車行邁方靡靡靜言芟枳
棘慎勿傷蘭芷

送喬隨州侃

結友三十載同遊一萬里情為契闊生心由
別離死拜恩前後人從宦差池起今爾歸漢
東明珠報知已

被彈

知人昔不易舉非貴易失爾何按國章無罪
見呵叱平生守直道遂為衆所嫉少以文作
吏手不曾開律一旦法相持荒忙意如漆幼
子雙囹圄老夫一念室昆弟兩三人相次俱
囚桎萬鑠當衆怒千謗無片實庶以白黑纔
顯此涇渭實効吏何咆哮晨夜聞撲扶事問
實虛證理外存枉筆懷痛不見申抱冤竟難
悉窮囚多垢膩愁坐饒蟣蝨三日唯一飯兩
旬不再櫛是時盛夏中曠赫多瘵疾瞪目眠
欲閉暗鳴氣不出有風自搖扶鼓蕩無倫匹
安得吹浮雲令我見白日

傷王學士 并序

王君赦者少小遊洛陽吾與君隴西李子至
為友家貧倦道歲常宴如屬文毫翰吟諷所
得時會絕竟長安初以器行制在蕃邸侍諸
人遊四年余遭浮議下獄他日余至來知君
物化嗚呼穎叔享年不遐昔同為人今先鬼
錄恨吾非所闕爾喪葬退而賦詩以哀命

閉囚斷外事昧坐半企暮有言頽叔子亡來
已一時初聞宛不信中話涕漣漣而痛哉玄夜
重何處青春姿憶汝曾旅食屢空纏澗湄五
徙祿未厚簪斗愧相貽原憲貧無愁顏回樂
自持詔書擇才善君爲王子師寵儒名可尚
論秩官猶欺化往不復見情來安可思目絕
毫翰灑耳無歌調期靈樞寄何處精魄今何
之恨予在丹棘不得看素旗孀妻知己歎幼
子路人悲感遊值商日絕絃留此詞

夜泊越州逢北使

天地降雷雨放逐還國都重以風潮事年月
戒回艫容顏荒外老心想域中愚憇泊在茲
夜炎雲逐斗樞颺颺縈海若霹靂耿天吳鼇
抃群島失鯨吞衆流輸偶逢金華使握手淚
相濡飢共噬齊棗眠共席秦蒲既北思收濟
將南睿所圖往來固無咎何忽憚前楫

紹隆寺

并序

紹隆寺江嶺最奇去驩州城二十五里將北

客畢日遊憇隨例施香回於舟中作
吾從釋迦久無上師涅槃探道三十載得道
天南端非勝適殊方起誼世歸難放棄乃良
緣世慮不曾干香界紫北渚花龕隱南巒危
昂階下石演漾窓中瀾雲蓋看木秀天空見
藤盤處俗勤宴坐居貧業行壇試將有漏軀
聊作無生觀了然究諸品彌覺靜者安

神龍初廢逐南荒途出榔口望蘇耽
山

少曾讀仙史知有蘇耽君流望來南國依然
會昔聞泊舟問耆老遙指孤山雲孤山榔郡
北不與衆山群重省下縈映繚繞上紛紛碧
峰泉附落紅壁樹傍分選地今方爾升天因
可云不才子竄迹羽化子遺芬將覽成麟鳳
旋驚禦鬼文此中迷出處含思獨氛氲

辛歲十月上幸長安時扈從出西嶽
作

西鎮何穹崇壯哉信靈造諸嶺皆峻秀中峰

特美好傍見巨掌存勢如石東倒頗聞首陽
去開折之河道磅礴壓洪源巍峨壯清昊雲
泉紛亂瀑天磴矻宏抱子先呼其巔宮女世
不老下有府君廟歷載傳灑掃星明應天游
十月成豐鎬微末忝閒從兼得事蘋藻宿心
愛此山意欲拾靈草陰壑已冰閉雲竇絕探
討芬月期來過回策思方浩

初達驩州

流子一十八命子偏不偶配遠天遂窮到遲

日最後水行儋耳國陸行雕題 魂魄遊鬼
門骸骨遺鯨口夜則忍飢卧朝則抱病走搔
首向南荒拭淚看北斗何年赦書來重飲洛
陽酒

七言古詩

入少密溪

雲峯苔壁遶溪斜江路香風夾岸花樹密不
言通鳥道鷄鳴始覺有人家人家更在深巖
口澗水周流宅前後遊魚瞥瞥雙釣童伐木

丁丁赤樵叟自言避喧非避秦
薜衣耕鑿帝堯人
相留且待雞黍熟
夕卧深山蘿月春

鳳簫曲

八月涼風動高閣
千金麗人捲綃幕
已憐池上歇芳菲
不念君恩坐搖落
世上榮華如轉蓬
朝隨阡陌暮雲中
飛鸞侍寢昭陽殿
班姬飲恨長信宮
長信宮昭陽殿
春來歌舞妾自知
秋至容華君不見
昔時羸女厭世氛
學吹鳳簫乘綵雲
含情轉眄向蕭史
千載紅顏持

贈君

古歌

落葉流風向玉臺
夜寒秋思洞房開
水晶簾外金波下
雲母窓前銀漢回
玉階陰陰苔蘚色
君王履綦難再得
璇閨窈窕秋夜長
繡戶徘徊明月光
燕姬綵帳芙蓉色
秦女金鑪麝香
北斗七星橫
夜半清歌一曲斷
君腸

沈佺期集卷第一

沈佺期集卷第二

五言律詩

銅雀臺

昔年分鼎地今日望陵臺
一旦雄圖盡千秋遺令開綺羅
君不見歌舞妾空來恩共漳河水東流無重回

長門怨

月皎風泠泠長門次掖庭
玉階聞墜葉羅幌見飛螢
清露凝珠綴流塵下翠屏
妾心君未

察愁嘆劇繁星

巫山高

巫山高不極，合沓狀奇新。
暗谷疑風雨，陰崖若鬼神。
月明三峽曉，潮滿九江春。
爲問陽臺客，應知入夢人。

出塞

十年通大漠，萬里出長平。
寒日生戈劍，陰雲拂旆旌。
饑烏啼舊壘，疲馬戀空城。
辛苦臯蘭北，胡塵掩漢兵。

幸白鹿觀應制

紫鳳真人劫，班龍太上家。
天流芝蓋下，山轉桂旗斜。
聖藻垂寒露，仙杯落晚霞。
唯應問王母，桃作幾時花。

九日侍宴應制

御氣幸金方，憑高薦羽觴。
魏文頒菊蕊，漢武賜萸房。
去鶴留笙吹，歸鴻識舞行。
年年重九慶，日月奉天長。

樂城白鶴寺

碧海開龍藏青雲起鴈堂潮聲迎法鼓雨氣
濕天香樹接前山暗溪承瀑水涼無言誦居
遠清靜得空王

遊少林寺

長歌遊寶地徙倚對珠林鴈塔風霜古龍池
歲月深紺園澄夕霽碧殿下秋陰歸路煙霞
晚山蟬處處吟

岳館

洞壑仙人館孤峯玉女臺空濛朝雨合窈窕
夕陽開荒澗含輕雨虛巖應薄雷正逢鸞與
鶴歌舞出天來

早發平昌島

解纜春風後鳴榔曉漲前陽鳥出海樹雲鴈
下江煙積氣衝長島浮光溢大川不能懷魏
闕心賞獨泠然

夜宿七盤嶺

獨遊千里外高卧七盤西山月臨窓近天河
入戶低芳春平仲綠清夜子規啼浮客空留

聽褒城聞曙鷄

嶺表寒食

嶺外逢寒食春來不見飭洛中新甲子何日
是清明花柳爭朝發軒車滿路迎帝鄉遙可
念腸斷報親情

三日禁園侍宴

九重馳道出三巳楔堂開畫鷁中川動青龍
上苑來野花飄御座河柳拂天杯日晚迎祥
處笙鏞下帝臺

仙萼亭初成侍宴應制

山中氣色和宸賞第中過輦路披仙掌帷宮
拂帝蘿泉臨香澗落峰入翠雲多無異登玄
圃東南望白河

隴頭水

隴山飛落葉隴鴈度寒天愁見三秋水分爲
兩地泉西流入羗郡東下向秦川征客空回
首肝腸空自憐

關山月

漢月生遼海腫臃出半暉合昏玄莢郡中夜
白登圍暈落關山迥光含霜霰微將軍聽曉
角戰馬欲南歸

折楊柳

玉窓朝日映羅帳春風吹拭淚攀楊柳長條
踈地垂白花飛歷亂黃鳥思參差妾自肝腸
斷傍人那得知

紫騮馬

青玉紫騮鞍驕多影屢盤荷君能剪拂躑躅
噴桑乾踈足追奔易長鳴遇賞難從金一萬
里霜露不辭寒

上之回

制書下關右天子問回中壇墀經過遠威儀
侍從雄黃麾搖晝日青攄曳松風迴望甘泉
道龍山隱漢宮

和常州崔使君寒食夜

聞道清明近春闈向夕闌行遊晝不厭風物
夜宜看斗柄更初轉梅香暗裏殘無勞秉華

燭晴月在南端

歲夜安樂公主滿月侍宴

除夜子星迴天孫滿月杯詠歌麟趾合簫管
鳳雛來歲炬常燃桂春盤預折梅聖皇千萬
壽垂曉御樓開

奉和洛陽翫雪應制

周王甲子旦漢后德陽宮灑瑞天庭裏驚春
御苑中氛氲生浩氣颭杏舞回風宸藻光盈
尺賡歌樂歲豐

幸梨園亭觀打球應制

今春芳苑遊接武上瓊樓宛轉縈香騎飄飆
拂畫毬俯身抑未落迴轡逐傍流祗爲看花
鳥時時誤失籌

送金城公主適西番應制

金榜扶丹掖銀河屬紫閣那堪將鳳女還以
嫁烏孫玉就歌中怨珠辭掌上恩西戎非我
匹明主至公存

洛陽道

九門開洛邑雙闕對河橋白日青春道軒裳
半下朝乘羊稚子看拾翠美人嬌行樂歸恒
晚香塵撲地遙

驄馬

西北五花驄來時道向東四蹄碧玉片雙眼
黃金瞳鞍上留明月嘶間動朔風借君馳沛
艾一戰取雲中

荅竊虔州書

書報天中赦人從海上聞九泉開白日六翅
起青雲質幸恩先偵情孤枉未分自憐涇渭
別誰與奏明君

十三四時常從巫峽過他日偶然有
思

小度巫山峽荆南春欲分使君灘上草神女
廟前雲樹悉江中見猿多天外聞別來如夢
裏一想一氛氲

初達驩州

自昔聞銅柱行來向一年不知林邑地猶隔

道明天雨霧何時及京華若箇邊思君無限
淚堪作日南泉

天宮崔侍郎夫人盧氏挽歌

偕老言何謬香魂事永違潘魚從此隔陳鳳
宛然飛埋鏡泉中暗歲鐙地下微猶憑少君
術彷彿觀容輝

章懷太子靖妃挽詞

彤史佳聲載青宮懿範留形將鸞鏡隱魂伴
鳳笙遊送馬嘶殘日新螢落晚秋不知蒿里

曙空見隴雲愁

和洛州司士曹庭芝望月有懷

天使下西樓光含萬里秋臺前疑掛鏡簷外
似懸鈎張尹將眉學班姬取扇儔佳期應借
問為報在刀頭

和崔正諫秋日早朝

鷄鳴朝謁滿白露禁門秋爽氣臨旌戟朝光
映冕旒河宗來獻寶天子命焚裘獨負池陽
議言從建禮遊

則天門赦改年

聖人宥天下幽鑰動園狴六甲迎黃氣三光
降紫泥籠僮上西鼓振迅廣陽鷄歌舞將金
帛汪洋被遠黎

覽鏡

霏霏日搖蕙騷騷風灑蓮時芳園相奪俗態
豈恒堅恍忽夜川裏蹉跎朝鏡前紅顏與壯
志太息此流年

雜詩四首

鐵馬三軍去金閨二月還邊愁離上國春夢
失陽關池水瑠璃淨園花玳瑁班歲華空自
擲愁怨不勝顏

落葉驚秋婦高砧促暝機蜘蛛尋月度螢火
傍人飛清鏡紅埃入孤燈綠焰微怨啼能至
曉獨自懶縫衣

妾家臨渭北春夢著遼西何苦朝仙郡年年
事鼓鞞燕來紅壁語鶯向綠窓啼爲許長相
憶闌干玉筋齊

聞道黃龍戍頻年不解兵可憐閨裏月長在
漢家營少婦今春意良人昨夜情誰能將旗
鼓一為取龍城

咸陽覽古

咸陽秦帝居千載坐盈虛版築林光盡壇塲
霧聽踈野橋疑望日山火類焚書唯有驪峰
在空聞厚葬餘

和中書侍郎楊再思春夜宿直

西禁青春滿南端皓月微直廬宵駕合五夜
曉鍾稀星斗橫綸閣天河度鎖闥煙花章奏
裏紛向夕郎飛

少遊荆湘因有是題

峴北焚蛟浦巴東射雉田歲時宜楚俗耆舊
在襄川憶昨經過處離今二十年因君訪生
死相識幾人全

送陸侍御北使

古人貴將命之子出輜軒受委當不辱隨時
敢贈言朔途際遼海春思統轅轅安得回白

日留歡盡綠樽

洛州蕭司兵謁兄還赴洛成禮

棠棣日光輝高襟應序歸來成鴻鴈聚去作
鳳凰飛細草承輕傳驚花慘別衣灞亭春有
酒岐路惜芬菲

餞高唐州詢

弱冠相知早中年不見多生涯在王事容鬢
各蹉跎良守初分岳嘉聲即潤河還從漢闕
下傾耳聽中和

餞康郎中洛陽令

一臺推往妙三史佇來修應宰鳧還集辭郎
雉少留郊筵乘落景亭傳理殘秋願以絃歌
暇芝蘭想舊遊

安樂公主移入新宅

初聞衡漢來移住斗城隈錦帳迎風轉瓊筵
拂霧開馬香遺舊將鳳吹繞新臺為問沉冥
子仙槎何處回

李舍人山園送龐邵

符傳有光輝
誼誼出帝畿
東隣借山水
南陌駐驂駝
握手涼風至
當歌秋日微
高蟾去幼
緩人吏待霜威

同獄者嘆獄中無燕

何許乘春燕
多知辯夏臺
三時欲併盡
雙影未嘗來
食藥嫌叢棘
銜泥怯死灰
不如黃雀語
能雪冶長猜

驩州南亭夜望

昨望南亭夜
分明夢洛中
室家誰道別
兒女夢嘗同
忽覺猶言是
沉思始悟空
肝腸餘幾寸
拭淚坐春風

題椰子樹

日南椰子樹
杳裊出風塵
叢生調木首
圓實擯榔身
玉房九霄露
碧葉四時春
不及塗林果
移根隨漢臣

喜赦

去歲投荒客
今春肆青歸
津通幽谷暖
盆舉太陽輝
喜氣迎冤氣
青衣報白衣
還將盜浦

葉俱向洛城飛

沈佺期集卷第二

沈佺期集卷第三

五言律

酬蘇貞外味玄夏晚寓直省中見贈
並命登仙閣通宵直禮闈大官供宿膳侍吏
護朝衣卷幔天河入開窓月露微小池殘暑
退高樹早涼歸冠劍無時釋軒車待漏飛明
朝題漢柱三署有光輝

同韋舍人早朝

閶闔連雲起巖廊拂霧開玉珂龍影度珠履



鴈行來長樂宵鍾盡明光曉奏催一經傳舊
德五字擢英材儼若神仙去紛從霄漢回千
春奉休曆分禁喜趨陪

白蓮花亭侍宴應制

九日陪天仗三秋幸禁林霜威變綠樹雲氣
落青岑水殿黃花合山亭絳葉深朱旗夾小
徑寶馬駐青濤苑吏收寒果饗人膳野禽承
懽不覺暝遙嚮素秋砧

仙萼池亭侍宴應制

步輦尋丹嶂行宮在翠微川長者鳥滅谷轉
聽猿稀天磴扶階迥雲泉透戶飛閑花開石
竹幽葉吐薔薇徑狹難留騎亭寒欲進衣白
龜來獻壽仙吹返彤闈

奉和晦日幸昆明池

法駕乘春轉神池象漢迴雙星遺舊石孤月
隱殘灰戰鷁逢時去恩魚望幸來山花緹騎
遶堤柳幔城開思逸橫汾唱歌流宴鎬杯微
臣彫朽質羞覩豫章材

奉和聖制幸禮部尚書竇希玠宅

北闕垂旒暇南宮聽禮迴天臨祥鳳轉恩向
灌龍開蘭氣熏仙帳榴花引御杯水從金穴
吐雲是玉衣來池影搖歌席林香散舞臺不
知行漏晚清蹕尚徘徊

夏日都門送司馬負外逸客孫員外

任其北征

二庭追虜騎六月動周師廟略天人授軍麾
相國持復言徵二妙才命重當時畫省連征

橐橫門共別詞雲迎出塞馬風卷度河旗計
日方夷寇旋聞杖杜詩

奉和幸韋嗣立山莊侍宴應制

鼎臣休翰隙方外結遐心別業青霞境孤潭
碧樹林每遷東墅策遙弄北溪琴帝幸行時
豫台園賞歲陰移鑿明月沼張樂白雲岑御
栢瑤觥落仙壇竹徑深三章懸聖藻五等冠
朝簪自愧承恩盛咸言獨在今

昆明池侍宴應制

武帝伐昆明穿池習五兵水同河漢在館有
豫章名我后光天德垂衣文教成黷兵非帝
念勞物豈皇情春仗過鯨沼雲旗出鳳城靈
魚啣寶躍仙女廢機迎柳拂旌門暗蘭依帳
發生還如流水曲日晚棹歌聲

望瀛州南樓寄遠

層城記麗譙憑覽山重霄茲地多形勝中天
宛寂寥四榮摩鸛鶴百拱厲風颺北際燕王
館東連秦帝橋晴光七郡滿春色兩河遙傲

晚非吾土躊躇適遠囂離居欲有贈春草寄
長謠

塞北

胡騎犯邊埃風從丑上來五原烽火急六郡
羽書催冰壯飛狐冷霜濃候鴈哀將軍朝授
鉞戰士夜啣枚紫塞金河裏葱山鐵勒隈蓮
花秋劔發桂葉曉旗開祕畧三軍動妖氛百
戰摧何言投筆去終作勒銘回

自考功員外授給事中

南省推丹地東曹拜瑣闈惠移雙管筆恩降
五時衣出入宜真選遭逢每濫飛器慙公理
拙才謝子雲微按牘遺常禮朋僚隔等威上
台行揖讓中禁動光輝旭日千門起初春八
舍歸贈蘭聞宿昔談樹隱芳菲何幸益梅處
惟憂對問機省躬知任重寧止冒榮非

初冬從幸漢故青門應制

漢王建都邑渭水對青門朝市俱東逝墳陵
共北原荒涼蕭相關蕪沒邵平園全盛今何
何在英雄復重論故基仍岳立遺堞尚雲屯
當極土功壯安知人力煩天遊戒東首懷昔
駐龍軒何必金湯固無如道德藩微臣諒多
幸叅乘偶殊恩預此陳古事敢奏興已言

度安海入龍編

我來交趾郡南與貫腦連四氣分寒少三光
置日偏射佗曾馭國翁仲久遊泉邑屋遺戕
在魚鹽舊產傳越人遙捧翟漢將下看鳶北
斗崇山掛南風漲海牽別離頻破月容鬢駮

催年昆弟推由命妻孥割付緣夢來魂尚擾
愁委疾空纏虛道崩城淚明心不應天

從崇山向越常

并序

按九真圖崇山至越常四十里杉谷起古崇
山行谿從道明國來於崇山北二十五里合
水歌缺藤竹明昧有三十峰夾水直上千餘
仞諸仙窟宅在焉

朝發崇山下暮坐越山陰西從杉谷度北上
行溪深竹溪道明水杉谷古崇岑差池將不
合繚繞復相尋桂葉藏金嶼藤花閉石林天
窓虛的的雲竇下沉沉造化功偏厚真仙跡
每臨豈徒探怪異聊欲緩歸心

哭蘇眉州崔司業二公

并序

同時郎裴懷古者作牧潭府神龍二年秋八
月佺期承恩北歸途中覲止訪及故舊知眉
州蘇使君味道國子崔司業融馳旋間相次
而逝蘇往任鳳閣侍郎佺期忝通事舍人崔
重為鳳閣舍人佺期又遷給事並銜疇昔之

眷俱荷提獎之恩前年負譴南流二公先移
官守迨此凶問情理何堪所歎逐竄有期行
邁在遠哀不展舊禮不申卑流慟斯文冀通
幽路

渙汗天中發伶俜海外旋長沙遇太守問舊
幾人全國寶亡雙傑天才喪兩賢大名齊弱
歲高德並中年禮樂羊叔子文章王仲宣相
看尚玄髮相次入黃泉流放蠻陬闕鄉關帝
里偏親朋雲霧擁生死歲時傳崔昔揮宸翰

蘇嘗濟巨川絳衣陪下列黃閣謬差肩及此
俱冥昧云誰叙播遷隼輿懷舊轍鱸館想虛
筵家愛方休杵皇慈更撒懸銘旌西蜀路騎
吹北邙田隴樹應秋矣江帆故杳然罷琴明
月夜留劔白雲天涕泗湘潭水淒涼衡嶠煙
古來修短分神理竟難筌

哭道士劉無得

聞有玄都客成仙不易祈蓬萊向清淺桃杏
欲芳菲縮地黃泉出昇天白日飛少微星夜

落高掌露朝晞吐甲龍應出啣符鳥自飛國
人思負局天子惜披衣花月留丹洞琴笙下
翠微嗟來子桑扈爾獨返於幾

和元舍人萬頃臨池翫月戲為新體
春風搖碧樹秋霧卷丹臺復有相宜夕池清
月正開玉流含吹動金魄度雲來熠燿光如
沸翩翩景若推半環投積草碎壁聚流杯夜
久平無煥天清皎未墮鏡將池作匣珠以岸
為胎有美司言暇高興獨悠哉揮翰初難擬

飛名豈易陪夜光珠在握了了見沉灰

酬楊給事廉見贈省中

子雲推辯博公禮擅詞雄始自尚書省旋聞
給事中言從温室祕籍向瑣闥通顧我叨郎
署慙無草奏工分曹八舍斷解袂五時空宿
昔陪餘論平生賴擊蒙神仙應東掖雲霧限
南宮忽枉瓊田贈長歌蘭渚風

扈從出長安應制

漢宅規模壯周都景命隆西賓讓東主法駕

幸天中太史占星應春官奏日同旌門起長
樂帳殿出新豐翕習黃山下紆徐清渭東金
麾張畫月珠攄戴松風是節嚴陰始寒郊散
野蓬薄霜沾上路殘雪繞離宮賜帛矜耆老
褰旒問小童復除恩載洽望秩禮新崇臣忝
承明名多慙獻賦雄

送盧管記先客北伐

羽檄西北飛交城日夜圍廟堂盛徵選戎幕
生光輝鴈行度函谷馬首向金微湛湛山川
暮蕭蕭涼氣稀餞途予憫默赴敵子英威今
日揚朱淚無將灑鐵衣

釣竿篇

朝日斂紅煙垂竿向綠川人疑天上坐魚似
鏡中懸避檝時驚透猜釣每誤牽湍危不理
轄潭靜欲留船釣玉君徒尚徵金我未賢為
看芳餌下貪得會無筌

和戶部岑尚書參迹樞揆

大君制六合良佐參萬機大業永開泰臣道

日光輝

和鼎

食家聲衆所歸漢章題楚劍鄭武襲緇衣理
識當朝遠文華振古稀風雲神契合舟艤道
心微廟堂喜容與時物迺芳菲御柳垂仙掖
公槐覆理闡昔陪鸛鷺後今望鷗鵬飛徒御
清風頌巴歌聊自揮

同李舍人冬日集安樂公主山池

常聞天女貴家即帝宮連亭挿宜春果山衝
大液泉橋低鳥鵲夜臺起鳳凰年故事猶如
此新圖更可憐紫巖粧閣透青嶂妓臺懸峯
奪香爐巧池偷明鏡圓梅花寒待雪桂葉晚
留煙興盡方投轄金聲還復傳

送友人任括州

青春浩無際白日乃遲遲胡爲賞心客歎遇
此芳時甌粵迫茲守京闕從此辭茫茫理雲
帆草草念行期紛吾結遠佩帳餞出河湄太
息東流水盈觴難再持

夏日梁王席送張岐州

秦鷄常下雍周鳳昔鳴岐此地推雄撫惟梁
寄在期家傳七豹貴人擅八龍竒高傳生光
彩長林歎別離天人開祖席朝來候征麾翠
帟當郊敞彤幃向野被芄芄秋麥盛苒苒夏
條垂奉計何時入台階望羽儀

李員外秦援宅觀妓

盈盈粉署郎五日宴春光選客虛前館徵聲
徧後堂玉釵翠羽飾羅袖鬱金香拂黛隨時
廣桃環出意長轉歌遙合態度舞暗成行巧

落梅庭裏斜光映曉粧

移禁司刑

疇昔參鄉賦中年忝吏途丹唇曾學史白首
不成儒天子開昌籙群生偶大鑪散材仍普
夏弱羽遽搏扶寵邁乘軒鶴榮過食稻見何
功遊畫省何德理黃樞弔影慙非據傾心事
遠圖盜泉寧止渴惡水匪投軀任直翻多毀
安身遂少徒一朝逢紕謬三省竟無虞白簡
初心屈黃紗始望孤患平終不怒持尅每相

驅埋劔誰當辯偷金以自誣誘言雖委答流
議亦真符首夏方憂園高秋獨向隅嚴城看
熠熠圓戶對蜘蛛累餉唯妻子披冤是友于
物情牽倚杖入事限榮枯門客心誰在鄰交
迹儻無撫襟雙涕落危坐日憂趨聖旨垂明
德冤囚豈濫誅會希恩免理終望罪矜愚司
寇宜哀獄台庭幸恤辜漢皇虛詔上容有報
恩珠

入鬼門關

昔傳瘴江路今到鬼門關土地無人老流移
幾客還自從別京洛頽鬢與衰顏夕宿含沙
裏晨行岡路間馬危千仞谷舟險萬重灣問
我投何地西南盡百蠻

九真山靜居寺謁無礙上人

大士生天竺分身化日南人中出煩惱上下
即伽藍小澗香為剎危峰石作龕候禪青鶴
乳窺講白猿叅藤愛雲間壁花憐石下潭泉
行幽供好林掛浴衣堪弟子哀無識警王惜

未談機疑間不二蒙昧即朝三欲究因緣理
聊寬放棄慙超然虎溪夕雙樹下虛嵐

從驩州廨移住山間水亭贈蘇使君

遇坎即乘流西南到火洲鬼門因苦夜瘴浦
不宜秋歲儉穿胸老朝飛鼻飲頭死生離骨
肉榮辱間朋遊棄置一身在平生萬事休鷹
鷂遭誤逐豹虎怯真投憶昨京華子傷今邊
地囚願陪鸚鵡樂希並鸛鵠留日月渝鄉思
煙花換客愁幸逢蘇伯玉回借水亭幽山栢
張青蓋紅蕉卷綠油乘閑無火宅因放有漁
舟適越心當是居夷迹可求古來堯禪舜何
必罪驩兜

赦到不得歸題江上石

家住東京裏身投南海西風煙萬里隔朝夕
幾行啼聖主謳歌洽賢臣法令齊忽聞銅柱
使走馬報金鷄弃市沾皇握投荒漏紫泥魂
疲山鶴路心醉站鳶溪天鑿誅元惡宸慈恤
遠黎五方思寄忍萬姓喜燃臍自幼輪丹懇

何嘗玷白圭承言竄遐魅雪往間深狴墳壠
無由謁京華豈重躋炎方誰謂廣地盡覺天
低百卉雜殊恠昆蟲理賴睽閉藏元不墊搖
落反生萑瘡瘡因慈苦窮愁益復迷火雲蒸
毒霧陽雨濯雲霓周乘安交趾王恭輯畫題
少寬窮涸鮒猶愍觸藩羝配宅鄰州癩斑苗
接野哇山空歡鬪象江靜見遊犀翰墨思諸
季裁縫憶老妻小兒應離襍幼女未攀筭夢
蝶翻無定著龜詎有倪誰能竟此曲曲盡氣

酸嘶

答魑魅代書寄家人

魑魅來相問君何失帝鄉龍鍾辭北闕蹉跎
守南荒覽鏡憐雙髮沾衣惜萬行抱愁那去
國將老便垂裳影吞余他歲恩思宦洛陽三
春給事省五載尚書郎黃閣遊鸞署青嫌御
史香扈巡行太液陪宴坐明光渭北昇高苑
河南被楔塲煙花恒獻賦泉石每稱觴暇日
從休澣高車映道旁迎賓就丞相選士謁昭

王侍寵言猶得承歡謂不忘一朝貽厚譴五
宅竟同防克豎曾驅策權豪豈易當款顏因
侍從接武在文章且懼威非贗寧知心是狼
身猶納履誤情爲覆盆傷可難緣成業非關
行昧藏喜逢今改旦正朔復歸唐河讖隨龍
馬天書逐鳳凰朝容欣舊則宸化美初綱告
善雕旌建收寬錦旆張宰臣更獻納郡守各
明揚禮樂移三統舟車會八方雲沙降白遂
秦隴獻燒當三赦重天造千推極國詳大招

思復楚役俾限惟桑漲海緣真臘崇山壓古
棠雕題飛棟宇儻耳間衣裳伏枕神餘劣加
食力未強空庭遊翡翠窮巷倚枕柳緣體分
殊昔回眸宛異常吉凶恒委鄭年壽會詢唐
家本傳清白官移重掛牀上京無薄產故里
絕窮莊碧玉先時費菴頭此自將興言歎家
口何處待贏糧計吏從都出傳文大小康除
降沾二弟離折已三房劔外懸銷骨荆南預
斷腸音塵黃耳間夢想白眉良復此單棲鶴

銜雛願遠翔何堪萬里外雲海已溟茫戚屬
甘胡越聲名任糝糠由來休憤命命也信蒼
蒼獨坐尋周易清晨詠老莊此中因悞道無
問入猖狂

塞北

虜障天驕起秦城地脉分栢壇飛五將梅吹
動三軍鋒刃奔濤色旌旗烟火文朔風吹汗
漫飄礫灑輶輻海氣如秋雨邊烽似夏雲二
庭無歲月百戰有功勲形影隨魚貫音書在

鴈群歸來拜天子凱樂助南薰

送韋商州弼

會府應文昌商山鎮國陽聞君監都史斲罷
尚書郎王事嗟相失情人貴不忘累年同畫
省四海接文場點翰芳春色傳杯明月光故
交從此去遙憶紫芝香

沈佺期集卷第四

七言律詩

古意呈補闕喬知之

盧家少婦鬱金香
海燕雙棲玳瑁梁
九月寒砧催木葉
十年征戍憶遼陽
白狼河北音書斷
丹鳳城南秋夜長
誰爲含愁獨不見
更教明月照流黃

龍池篇

龍池躍龍龍已飛
龍德先天天不違
池開天

漢分黃道龍向天門入紫微邸第樓臺多氣
色君王鳧鴈有光輝為報寰中百川水來朝
此地莫東歸

興慶池侍宴應制

碧水澄潭映遠空紫雲香駕御微風漢家城
闕疑天上秦地山川似鏡中向浦迴舟萍已
綠分林蔽殿槿初紅古來徒羨橫汾賞今日
宸遊聖藻雄

侍宴安樂公主新宅應制

皇家貴主好神仙別業初開雲漢邊山出盡
如鳴鳳嶺池成不讓飲龍川粧樓翠幌教春
住舞閣金鋪借日懸敬從乘輿來此地稱觴
獻壽樂鈞天

奉和春初幸太平公主南莊應制

主家山第早春歸御輦春遊繞翠微買地鋪
金曾作埽尋河取石舊支機雲間樹色千花
滿竹裏泉聲百道飛自有神仙鳴鳳曲併將
歌舞報恩暉

奉和春日幸望春宮應制

芳郊綠樹散春晴，復道離宮煙霧生。
楊柳千條花欲綻，蒲萄百丈蔓初縈。
林香酒氣元相入，鳥嘯歌聲各自成。
定是風光牽宿醉，來晨復得幸昆明。

奉和立春日遊苑迎春

東郊暫轉迎春仗，上苑初飛行慶杯。
風射蛟冰千片斷，氣衝魚鑰九關開。
林中覓草纔生蕙，殿裏爭花併是梅。
歌吹銜恩歸路晚，樓烏

半下鳳城來

從幸香山寺應制

南山奕奕通丹禁，北闕峨峨連翠雲。
嶺上樓臺千地起，城中鐘鼓四天聞。
旃檀曉閣金輿度，鸚鵡晴林采旆分。
願以醍醐參聖酒，還將祇苑當秋汾。

紅樓苑應制

紅樓疑見白毫光，寺逼宸居福盛唐。
支遁愛山情謾切，曇摩泛海路空長。
經聲夜息聞天

語爐氣晨飄接御香誰謂此中難可到自憐
深院得徊翔

再入道場紀事應制

南方歸去再生天內殿今年異昔年見闢乾
坤新定位看題日月更高懸行隨香輦登仙
路坐近爐煙講法筵自喜恩深陪侍從兩朝
長在聖人前

嵩山石淙侍宴應制

金輿旦下綠雲衢彩殿晴臨碧澗隅溪水泠
泠逐行漏山煙片片引香爐仙人六膳調神
鼎玉女三漿捧帝壺自惜汾陽紆道駕無如
太室覽真圖

遙同杜員外審言過嶺

天長地闊嶺頭分去國離家見白雲洛浦風
光何所似崇山瘴癘不堪聞南浮漲海人何
處北望衡陽鴈幾群兩地江山萬餘里何時
重謁聖明君

和上巳連寒食有懷京洛

天津御柳碧遙遙軒騎相從半下朝行樂光
輝寒食借太平歌舞晚春饒紅粧樓下東迴
輦青草洲邊南渡橋坐見司空掃西第看君
侍從落花朝

人日重宴大明宮賜彩縷人勝應制

拂旦鷄鳴仙衛陳憑高龍首帝城春千官黼
帳杯前壽百福香奩勝裏人山鳥初來猶怯
轉林花未發已偷新天文正應韶光轉設報
懸知用此辰

五言絕句

寒食

普天皆滅燭匝地盡藏煙不知何處火來就
客心然

獄中燕

拾盡和叢棘啣杯怯死灰不如黃雀語能雪
冶長猜

七言絕句

上巳日祓楔渭濱

寶馬香車清渭濱
紅桃碧柳楔堂春
皇情尚憶垂竿佐
天祚先呈捧劍人

秦和幸韋嗣立山莊應制

東山朝日翠屏開
北闕晴空綵仗來
喜遇天文七曜動
少微今夜近三台

邙山

北邙山上列墳塋
萬古千秋對洛城
城中日夕歌鍾起
山上唯聞松柏聲

夜宴安樂公主宅

淮龍門外主家親
鳴鳳樓中天上人
自有金杯迎甲夜
還將綺席代陽春

餞康郎中洛陽令

洛陽舊出神明宰
輦轂由來天地中
餘邑政成何足貴
因君取則四方同

獄中聞駕幸長安二首

傳聞聖旨向秦京
誰念羈囚滯洛城
扈從由來是方朔
爲申冤氣在長平
無事今朝來下獄
誰期十月是橫河
君看鷹

隼俱堪繫為報蜘蛛收網羅

苑中遇雪應制

北闕彤雲掩曙霞
東風吹雪舞山家
瓊章定少千人和銀樹
長芳六出花

沈佺期集卷第四終



